

EUROPAKO BATASUNA. NATO, OSCE eta Hamabostak gaur bilduko dira, hartu beharreko neurriak koordinatzeko

Presevo baketzeko Belgraderen plana onartu dute Atzerri ministroek

Serbiako eskualdean dagoen behatzaile taldea handitzea erabaki dute, besteren artean

Agentziak | BRUSELA

Nebojsa Covic Serbiako Gobernuko lehen ministrordeak Presevo baketzeko aurkezturiko planari sostengua ematea erabaki zuten atzo EB Europako Batasuneko Atzerri ministroek Bruselan eginiko bileran.

Honez gain, Presevoko bailaran eta Kosovoren inguruan ezarritako bost kilometroko segurtasun eremuan dagoen behatzaile taldea handitzea erabaki zuten atzoko batzarrean. Antoin Mac Irlandak Turkian duen enbaxadorea izango da 30 behatzaile izango dituen talde horren burua, erabakitakoaren arabera.

Europako Batasunaren erabakiak bat egin du Javier Solana EBko Atzerri Politikarako arduradunak ministroei helarazitako gutun batean jasotzen ziren proposamenekin. Serbiako lehen ministrordearen plana onartzeko dei egin zien Solanak Europako Atzerri ministroei. Hala, Hamabostek geldiarazi egin nahi dituzte Kosovotik sartutako gerrillari albaniarrek azken hilabeteotan Serbian dagoen Presevo bailaran egin dituzten erasoak.

Serbiako Gobernuaren bake egitasmoa

Eskutitz baten bidez helarazi zien Solanak Europako Atzerri ministroei bake egitasmoa onartzeko eskaera. Joan den astean Serbiako agintariekin eginiko bileren ondoren «egoe-
ra arriskutsua» zela eta oker zitekeela ohartu zen Solana, Atzerri ministroei berri eman zenez.



THIERRY CHARLIER / AP

Javier Solana —ezkerrean— Hans Haekkerup NBEren Kosovorako misio burua agurtzen, bilera aurretik.

Nebojsa Covic Serbiako lehen ministrordeak aurkezturiko plana «perfektua ez izan arren, bake konponbidea aurkitzeko Belgradeko agintariekin duten konpromisoa» erakusten du, Solanak gutunean adierazi zenez. Halere, egitasmoa burutzekoan Serbiako Gobernuari «nazioartearen berehalako eta pisuzko sostengua» ezinbestekoa izango zaiola gaineratu zuen EBko Atzerri Politikaren arduradunak.

Belgradeko agintariekin koordinatzeko eskatzeaz gain, hainbat urrats egiteko eskatu zuen Solanak. Horietako lehena

zen Kosovoko eta Mazedonia-ko albaniarrei bakearen alde lan egin zezaten «mezu argia» helaraztea; «etorkizunean gure aldetik izango duten laguntza gai honen inguruan hartutako jarreraren arabera izango da», argitu zuen.

Diru laguntzak handitzean zetzan beste Solanaren proposamenetako bat. Europako Batzordeak Presevo-ri zuzenduriko 900.000 euroko larrialdi laguntza iragarri du. Honez gain, etnia guztietako kideak batuko lituzkeen Polizia indar bat eratzea iradoki zuen EBko Atzerri politikarako arduradunak. Ser-

biako Gobernuako lehen ministrordeak eskatu zion berriki nazioarteari «indar horiek osatzen eta trebatzen» laguntzeko. EBk Presevoko bailaran duen behatzaile taldea handitzea izan zen Atzerri ministroek onartutako beste proposamena.

EB-NATO bilera gaur Bruselan

Gaur egingo dute bilera Europako Batasuna, NATO eta OSCE Europako Segurtasun eta Kooperaziorako Erakundeko ordezkariak Presevoko bailaran hartu beharreko neurriak koordinatzeko.

Aipaturiko ordezkariak gain,

NAZIOARTEAREN ROLA

Elkarlanean arituz gero «gatazka bat saihesteko aukera dago», EBko Atzerri Politikarako arduradunaren ustez

GERRILLA ALBANIARRA

«Eskualdearen orekari mehatxu egiten dioten talde armatuen ekintzak» gaitzetsi dituzte EBko ministroek

Nazio Batuen Erakundeko kideak bilduko dira gaur Bruselan. Solanak atzo prentsaurrean adierazi zuenaren arabera, bileraren helburua da NATO, NBE eta OSCE «elkarlanean aritu daitezela», «gatazka bat saihesteko aukera» dagoelako.

Gerrillari Albaniarrak Serbiaren aurka eginiko erasoak gaitzetsi zituzten Europako Batasuneko Atzerri ministroek. «Eskualdearen orekari mehatxu egiten dioten talde armatuen ekintzak» salatu zituen.

Tiroketak Mazedonia eta Kosovoko mugan

Tiroketa gogorak gertatu ziren atzo Mazedonia eta Kosovoren arteko mugan, hainbat albiste iturrik jakinarazi zutenaren arabera. Tanusevci herriaren inguruan izan ziren borroka eta, antza denez, hegazkinen kontrako armekin egindako tiroak izan ziren tartean. Ustez Kosovoko albaniar gerrillarien eta Mazedoniako Segurtasun Indarren arteko gatazka izan zen. Mazedoniako Gobernuak joan den astean eginiko Balkanetako goi-bileran ohartarazi zuenez, Kosovoko inguruan dabilzan gerrillari albaniarrek Balkanak desoreka ditzakete.

BAKE PROZESUEN ALDE

KONGOKO ERREPUBLIKA DEMOKRATIKOA

Baldintzapeko laguntza emango diote Kinshasari

Kongoko Errepublika Demokratikoari laguntza ematen jarraitzeko prest agertu ziren atzo Europako Batasuneko Atzerri ministroak. Kinshashak, halere, hainbat baldintza bete beharko lituzke laguntzok jaso ahal izateko. Atzerri ministroek «ontzat» eman zituzten Kongoko Errepublika Demokratikoko agintariek erreforma ekonomikoak egiteko

eta Lusakako bake akordioa abian jartzeko hartutako azken konpromisoak. «Gobernua ekintza zehatzen bidez hasten bada, Europako Batasuna prest dago garapenerako laguntzak berriz ematen hasteko», adierazi zuten Bruselan batzarturiko Atzerri ministroek.

Lusakako Bake Hitzarmena abian jartzeko dei egin zuen Europako Batasunak, eta bi aldeei «tropak berehala desmobilizatu eta erretiratzeko» exijitu zien, «Kongoko Errepublika demokratikoaren burujabetza eta lurraldetasuna bermatzeko». Honez gain, giza laguntza handitzea agindu zuten EBko Atzerri ministroek.

PALESTINA

Hirurogei milioi euro PANi eusteko

Palestinako Aginte Nazionalaren krisia gainditzeko 60 milioi euroko diru laguntza ematea erabaki zuten atzo Europako Batasuneko Atzerri ministroek. Honez gain, martxorako «emaila batzarra» deitzeko prestakizunak egitea erabaki zuten. Israelek etendako ordainketaren konpentsazio gisa emango dituzte agindutako 60 milioi euroak. Israelgo gobernuak zergen bidez jasotako zati bat palestinarrei emateko betebeharra du,

baina *intifada* berpiztu zenetik bertan behera utzi zituen ordainketak, Palestinako Aginte Nazionala porrot ekonomiko bidean jarritz.

Chris Patten Europako Batasunaren Atzerri Komisarioak Batasunaren laguntza mugatua dela esan, eta Ekialde Erdiaren bake prozesuarekin engaiatuta dauden beste estatuei laguntza emateko eskatu zien.

Europako iparraldeko hiriburu batean egingo litzateke diru emailen batzarra, eta Jasser Arafat presidente duen Palestinako Aginte Nazionalari hurrengo sei hilabeteetan bizirauteko dirutza biltzea espero da.